

19 JUN 2001

Umno-Pendaftaran

ANGGOTA PERWAKILAN MENDAFTAR UNTUK KE PERHIMPUNAN AGUNG UMNO

KUALA LUMPUR, 19 Jun (Bernama) -- Perhimpunan Agung Umno ke 55 yang akan dimulakan dengan persidangan Pergerakan Pemuda dan Wanita esok, mula menerima pendaftaran anggota perwakilan hari ini.

Kaunter khas bagaimanapun dibuka terlebih dahulu untuk anggota perwakilan Pemuda dan Wanita yang akan menghadiri persidangan esok di Pusat Dagangan Dunia Putra (PWTC) di sini.

Persidangan itu akan dirasmikan serentak oleh Timbalan Perdana Menteri Datuk Seri Abdullah Ahmad Badawi.

Menurut seorang petugas kaunter pendaftaran itu, hampir 80 peratus anggota perwakilan untuk persidangan esok telah mendaftar sejak kaunter dibuka pada pukul 12 tengah hari hingga pukul 4.30 petang.

Kaunter itu akan dibuka sehingga semua perwakilan mendaftar, kemungkinan menjangkau lewat tengah malam.

Anggota perwakilan ke perhimpunan Pergerakan Pemuda di Dewan Tun Dr Ismail PWTC dijangka seramai 689 orang dan perhimpunan Wanita di Dewan Tun Hussein Onn dijangka dihadiri seramai 635 orang.

Beberapa kaunter lagi akan dibuka esok untuk menerima pendaftaran anggota perwakilan ke Perhimpunan Agung Umno yang dijangka seramai 2,027 orang dari 165 bahagian Umno seluruh negara.

Sebahagian daripada anggota perhimpunan agung selama tiga hari itu mulai Khamis, telahpun berhimpun di PWTC hari ini untuk menghadiri Majlis Taklimat Presiden Datuk Seri Dr Mahathir Mohamad yang diadakan secara tertutup di Dewan Merdeka.

-- BERNAMA

ZAI RON